

2^{da} SESSIONE STRASURDINARIA DI U 2025
22 È 23 DI MAGHJU DI U 2025

2^{ème} SESSION EXTRAORDINAIRE DE 2025
22 ET 23 MAI 2025

N° 2025/E2/032

**Question orale déposée par Mme Elisa TRAMONI
au nom du groupe « Fà Populu Inseme »**

OBJET : CHÌ DIMINZIONI PÀ A CUMMEMURAZIONI DI L'AVINIMENTI D'ALERIA.

O Sgiò Prisidenti di u Cunsigliu esecutivu di Corsica,

50 anni fà s'hè tinutu un avinimentu chì hà cambiatu a faccia di a Corsica pà u sempri. I 21 è 22 d'Austu di u 75 ani stampatu una vulintà forti di ghjustizia è di difesa di l'identità culturali corsa, in a menti di l'isulani. U fattu di mova si contrà a problematica stritta in quant'à a pruduzioni viticula hà in fattu parmissu di metta in lumu problematichi monda più larghi com'è a nicazioni di i diritti d'un populu, di a so cultura, di a so lingua, di a so tarra, è di a so capacità à dicida di u so avvena. È issi problematichi firmani sempri oghji.

Iss'avinimenti si scrivini in u periudu di u Riacquistu, periudu di presa di cuscenza culturali, suciali è pulitica maiori, cù i so ideai naziunalisti muderni, è i so rivendicazioni forti (riapertura di l'Università, ricunniscenza di u populu corsu, difesa è prumuzioni di a lingua, difesa di l'ambienti, lotta contr'à a speculazioni).

Ciò chì hè statu trattatu solamenti com'è un avinimentu puliticu devi essa cunsidaratu oghji è più ch'è mai com'è un fattu storicu. Issu fattu oghji ùn faci più solamenti parti di a storia di i naziunalisti, ma di storia di a Corsica.

Allora chì ni semu à discussioni incù u Statu nant'à u statutu d'autunumia, hè più chì primurosù di ricunnosca l'impurtanza storica d'Aleria, pà i ghjinirazioni attuali è a vena. Ghjust'à puntu, i ghjovani ani dighjà musciatu u so intàressu pà u sughjettu incù u votu d'una muzoni di sustegnu à l'associu Aleria 75 da l'Assemblea di a Ghjuventù.

Par ch'idd'ùn si sfundessi mai u chjassu di issa storia, par chì i ghjinirazioni à vena ùn si smintichessini micca di ciò chì fù, è ch'iddi si ni ghjuvessini pà custruiscia ciò chì sarà, vi dumandu di chì manera u Cunsigliu Esecutivu hà da pudè ricunnosca a diminzioni storica di l'avinimenti d'Aleria è accumpagnà l'organizzazioni di i so

cinquant'anni, nant'à punti simbolichi è matiriali, à u latu di l'attori assuciativi, culturali
è stituziunali impignati in issa dimarchja di mimoria.

Vi ringraziu